

ԿԱՐԾԻՔ

Անրիետա Արաիկի Կարապետյանի՝ «Հայ օգտատերերի հաղորդակցական ռազմավարությունները վիրտուալ սոցիալական ցանցերում» թեմայով ատենախոսության վերաբերյալ՝ ԻԲ 00.01 «Սոցիոլոգիական հետազոտությունների մեթոդաբանություն, տեսություններ, սոցիալական տեխնոլոգիաներ և գործընթացներ» մասնագիտությամբ սոցիոլոգիական գիտությունների թեկնածուի գիտական աստիճանի հայցման համար

Աշխատանքի արդիականությունն ու անհրաժեշտությունը պայմանավորված է ողջ աշխարհում սոցիալական ցանցերի օգտատերերի թվի ավելացմամբ, առցանց հաղորդակցության հարթակների ակտիվ տարածմամբ: Վերջիններս ոչ միայն Հայաստանում, այլև ամբողջ աշխարհում բազմաթիվ ուսումնասիրությունների առիթ են հանդիսանում օգտատերերի հաղորդակցական առանձնահատկությունների, նախասիրությունների բացահայտման առումով:

Հաղորդակցության սոցիոլոգիան զարգացած տիրույթ է, իսկ ատենախոսն իր աշխատանքի տեսական հատվածում արտահայտել է հաղորդակցության սոցիոլոգիայի տեսանկյունից այսօր առաջին պլան մղված մի շարք խնդիրներ:

Սույն ատենախոսական աշխատանքում արտացոլվում են այնպիսի դրույթներ, ինչպիսիք են հայ օգտատերերի հաղորդակցական նախասիրությունների և սոցիալական ցանցերում հաղորդակցվելու մոտեցումների բացահայտումը, հաղորդակցական տարատեսակ սուբյեկտների հետ հաղորդակցական եղանակների նախընտրելիությունը, լայն տարածում գտած սոցիալական ցանցերում հայ օգտատերերի առանձնահատկությունների արտածումը:

Նպատակի իրագործման համար հեղինակն ուսումնասիրության է ենթարկել Մարշալ Մաքլուհանի, Նիկլաս Լումանի, Յուրգեն Հաբերմասի, Էրվինգ Գոֆմանի և մի շարք այլ տեսաբանների աշխատությունները: Ներկայացվել է վիրտուալ սոցիալական ցանցի ընձեռած հնարավորությունները, դրա զարգացման ու առցանց հաղորդակցությունների լայն տարածման հետևանքները:

Հեղինակը աշխատանքում ներկայացրել է հաղորդակցության վերաբերյալ մի շարք տեսաբանների աշխատություններ և վեր հանել այն դրույթները, որոնց հիման վրա իրականացվել է հետազոտությունը, մեկնաբանված են հաղորդակցության հիմնական տեսությունները, մոդելները, բաղադրիչները, գործառույթներն ու խոչընդոտները:

Անդրադառնալով Մարշալ Մաքլուհանին, ով շեշտադրում է հաղորդակցական միջոցի սկզբունքային դերը հաղորդակցման բնույթի առումով՝ ատենախոսը համեմատականներ է անցկացնում սոցիալական ցանցերով իրականացվող հաղորդակցության հետ՝ վերջինս համարելով «միջնորդ»: Նպատակի իրականացման համար ատենախոսը քննարկել է նաև հաղորդակցության մի շարք մոդելներ, որոնցից առանձնացրել է Հարոլդ Լասսուելի հնգահարց հաղորդակցական մոդելը, համաձայն որի հաղորդակցությունը կենտրոնացած է հենց արդյունքի վրա:

Հեղինակն իր առջև նպատակ է դրել պարզել հայ օգտատերերի հաղորդակցական ռազմավարությունները՝ վիրտուալ սոցիալական ցանցերում, ստեղծել հայաստանյան օգտատերերի հաղորդակցական բնութագրիչներ, տիպաբանել նրանց և այլն, իսկ նպատակի իրագործման համար առաջադրել այնպիսի խնդիրներ, որոնց բացահայտումը լիովին տվել են հետազոտության առջև դրված խնդիրների լուծումները:

Ատենախոսության մեջ կիրառվել են ընդհանուր և հատուկ գիտական մեթոդներ: Հատկանշական է, որ ատենախոսն ընտրել է հենց առցանց եղանակով անկետավորման հարթակ, ինչը թույլ է տվել ստանալ հավելյալ տեղեկություն առցանց հարթակում առավել ակտիվ և ներգրավված օգտատերերի տարատեսակ կատեգորեաների մասին:

Ատենախոսությունն ունի արժեքավոր կողմեր, այդ թվում.

1. Ինչպես նկատելի է թեմային հատուկ գրականության ցանկից, տարակարծությունները կապված առցանց հարթակին վերաբերող հասկացությունների բավականին շատ են: Այս առումով նորույթների տեսանկյունից առավել կարևորներից է հեղինակի կողմից «անցանց» և «առցանց» հաղորդակցությունների սահմանումների հստակեցումը, նմանօրինակ հասկացությունների հիմնավորումը, ինչպես նաև «անցանց հաղորդակցում» եզրույթի շրջանառության մեջ դնելու հանգամանքը:
2. Հայ օգտատերերի հաղորդակցական ռազմավարությունների բացահայտման միջոցով իրականացվել է օգտատերերի տիպաբանում: Համեմատելով ստացված տիպերը այլ երկրներում առցանց հաղորդակցությունների օգտատերերի տիպերի հետ՝ դուրս է բերվել նոր «թափառող» տիպը, որը բնութագրվում է ամեն պատեհ – անպատեհ առիթով սոցիալական ցանց մուտք գործելու մոտեցումով:
3. Արժեքավոր է նաև հեղինակի եզրակացությունն այն մասին, որ հայ օգտատերերի մեծամասնության համար վիրտուալ սոցիալական հարթակները միջոց են՝ արդեն իսկ առկա ընկերների, ծանոթների հետ շփման համար: Միևնույն ժամանակ,

օգտատերերի մեկ երրորդը նախընտրում է հենց սոցիալական ցանցերը՝ նոր մարդկանց հետ ծանոթանալու և շփվելու համար, ինչն ավելի դյուրին է և նախընտրելի՝ համեմատած անցանց պայմաններում անծանոթների հետ շփման նախաձեռնման հետ:

Թերություններից են.

1. Արժեքավոր կլիներ տարբեր երկրների, մասնավորապես, ՌԴ հայ օգտատերերի հաղորդակցական առանձնահատկությունների առանձնացումը, ինչը նաև հնարավորություն կտար ստանալ համեմատական տվյալներ Հայաստանյան հայ օգտատերերի հետ: Հետաքրքիր կլիներ ներառել հենց ռուսական սոցիալական ցանցերի հայաստանյան օգտատերերին: Ատենախոսը որևէ կերպ չի առանձնացնում տարբեր երկրների հայ օգտատերերին:
2. Ատենախոսության տեսական մասում վերլուծվել է մեծ ծավալի և տևական ժամանակահատվածի նյութ, քննարկվել են մի շարք ամերիկյան և եվրոպական հեղինակների աշխատություններ, սակայն սակավաթիվ են ռուսաստանյան հեղինակները, որոնցից շատերը ևս ունեն սոցիալական ցանցերին նվիրված արժեքավոր ուսումնասիրություններ: Աշխատանքը կշահեր այս դրույթը հաշվի առնելու և ռուսաստանյան հեղինակներին ներառելու պարագայում:

Այսպիսով՝ ատենախոսության արդյունքում բացահայտվում են հայ օգտատերերի հաղորդակցական ռազմավարությունները վիրտուալ սոցիալական ցանցերում, հայաստանյան օգտատերերի հաղորդակցական բնութագրիչների համաձայն հայտնաբերվում են օգտատերերի տեսակները, բնութագրվում հայ օգտատերերի հաղորդակցական նախասիրությունները, նպատակները, մոտեցումները և այլն: Արժեքավոր են նաև իրականացված եզրակացությունները:

Չնայած նշված թերությունների՝ ատենախոսության մեջ կարևոր ոլորտային հիմնախնդիրների բարձրացումը և ուսումնասիրությունը, դրանց լուծմանն ուղղված մասնագիտական ջանքերն ու ստացված արդյունքները հիմք են կատարված աշխատանքի գնահատման համար: Հեղինակի կողմից հրատարակված յոթ գիտական հոդվածները ևս արտացոլում են ատենախոսության բովանդակությունը:

Այսպիսով՝ ատենախոսության մեջ արծարծվող հիմնախնդիրների վերլուծության և լուծման կարևորությունը թույլ է տալիս եզրակացնելու, որ այն բավարարում է

թեկնածուական ատենախոսություններին առաջադրվող պահանջներին, իսկ ատենախոս Ա. Կարապետյանը՝ ԻԲ. 00.01 «Սոցիոլոգիական հետազոտությունների մեթոդաբանություն, տեսություններ, սոցիալական տեխնոլոգիաներ և գործընթացներ» մասնագիտությամբ սոցիոլոգիական գիտությունների թեկնածուի գիտական աստիճանի շնորհմանը:

Պաշտոնական ընդդիմախոս՝

Արմեն Կոլյայի Սահակյան

սոցիոլոգիական գիտությունների դոկտոր, պրոֆեսոր

21.10.2024 թ.

Քաղաքական գիտությունների դոկտոր, պրոֆեսոր Ա. Կ. Սահակյանի ստորագրությունը հաստատում է

ԵՊՀ Գիտական քարտուղար, Երևանի պետական գիտությունների թեկնածու, դոցենտ Մ. Վ. Հովհաննիսյան

